



VValafridus insigni pietate & felici ingenio erat præditus. Itaque literarum amore sese in S. Galli monasteriũ, scholam eo tempore celeberrimam, cõtulit, ut suum ingenium optimis artibus excoleret. Hinc factum ut audiendo & legẽdo doctissimis uiris annumeratus fuerit. Cum hoc modo feliciter pergeret, atque abbas diuitis Augiæ in lacu Veneto mortuus esset, in eius locum hic Valafridus communi Monachorum consensu duodecimus Abbas electus fuit, Anno octingentesimo quadagesimo secundo. Verũm is nihilominus in literarũ cultu perrexit, & suo exemplo Monachos ad omnis generis uirtutes pellexit. Scripsit enim

uarias rerum præteritarum Historias, præterea petente Gothofredo abbate S. Gallensi, uitas S. Galli, & S. Othmari. Cum hoc modo per septem annos eo in loco magna gloria præfuisset, uiam uniuersæ carnis ingressus, Volcoinum successorem habuit. Trit, Stumpff, lib. 5. cap. 12.